



Inzko se sastao s Bevandom: evropska integracija, ekonomija i državni budžet su prioriteti

„Građani ove zemlje žele da vide ponovno pokretanje privrede, više optimizma i nade“, rekao je danas popodne visoki predstavnik Valentin Inzko povodom sastanka sa predsjedavajućim Vijeća ministara BiH Vjekoslavom Bevandom.

Čestitajući Vjekoslavu Bevandi na imenovanju, visoki predstavnik se složio s njim da su prioriteti nove vlade evropska integracija Bosne i Hercegovine, ekonomija, te osiguranje punog finansiranja institucija BiH i njenih međunarodnih obaveza u 2012. godini. S tim u vezi, sagovornici su se složili oko hitnosti usvajanja Globalnog fiskalnog okvira za period 2012.-2014. i državnog budžeta za 2012. godinu u skladu sa Ustavom i zakonom.

“Prioritetni zadatak nove vlade je očuvanje fiskalne održivosti institucija BiH tako što će se osigurati da Parlamentarna skupština, na prijedlog Predsjedništva BiH, usvoji budžet za 2012. godinu kojim se pokrivaju troškovi potrebni za vršenje nadležnosti i puno funkcioniranje institucija BiH, te izvršavanje međunarodnih obaveza BiH“, rekao je Inzko.

Visoki predstavnik i predsjedavajući Vijeća ministara konstatirali su da se izgubljeno vrijeme mora nadoknaditi dodatnim naporima kako bi se iskoristile preostale godine mandata i ponovo postigao pozitivan trend.

Inzko i Bevanda su se složili da je poduzimanje mjera kojima se podstiče ekonomski rast i zapošljavanje prioritet u BiH i da je u realizaciji ovog zadatka neophodna bliska saradnja između svih nivoa vlasti. Sagovornici su se, između ostalih, dotakli i tema presude u slučaju Sejdić-Finci, državne i vojne imovine.

Visoki predstavnik Inzko je rekao da je izbor predsjedavajućeg i Vijeća ministara vratio optimizam na političku scenu u BiH, te je zaželio predsjedavajućem Vijeća ministara Bevandi puno uspjeha u obavljanju njegovog veoma zahtjevnog mandata i ispunjenju očekivanja građana Bosne i Hercegovine.